



**PUO EA MOHLOMPHEHI TONA-KHOLO
DR. MOTSOAHAE THOMAS THABANE EA
HO BULA KA MOLAO TSELA EA
ALWYN'S KOP-TELE, QUTHING**

LA 4 MOTŠEANONG 2018

**Motsamaisi oa mosebetsi ona, ntumelle ho isa hlomphe
ho:**

Motlotlehi Letsie la Boraro

Mohlomphehi Mookameli oa Ntlo ea Senate

**Mohlomphehi Motsamaisi oa Lipuisano Ka Lekhotleng la
Sechaba**

Mohlomphehi Moahloli e Moholo

Mohlomphehi Motlatsi oa Tona-Kholo

Bahlomphehi Matona le Batlatsi ba Matona

**Bahlomphehi Baahloli ba Lekhotla le Phahameng le
Lekhotla la Maipiletso**

**Their Excellencies Heads of Diplomatic Missions and
International Organizations**

Mohlomphehi Ramolao e Moholo

Mohlomphehi Motlatsi oa Mookameli oa Ntlo ea Senate

**Mohlomphehi Motlatsi oa Motsamaisi oa Lipuisano ka
Lekhotleng la Sechaba**

**Litho tse Khabane tsa Ntlo ea Senate le Marena a
Sehlooho**

Litho tse Khabane tsa Lekhotla la Sechaba

Bahlanka bohle sechaba

Sechaba sa heso, le lona bana kea le lumelisa

Molweni bo tata, no bo mama

Ke motlotlo haholo hore ebe lebitsong la 'Muso oa Motlotlehi, letsatsing lena la kajeno ke eme kapele ho lona bohle ho tla bula mosebetsi ona o moholo oa tsela oo e leng karolo ea leeto le le lelele leo 'Muso o keneng ho lona ho phethahatsa tšepiso ea ona ho sechaba sa Basotho. Tšepiso ea ho fenya sera se seholo sa Basotho: bofuma le tlala.

'Muso oa Lesotho o lumela kantle ho qeea-qeeo hore ho nolofaletsa Basotho mokhoa oa ho phetha maeto ka khaho ea litsela le marokho ke eona tšiea ea mantlha ea ntlafatso ea moruo ekasitana le litšebeletso tse fanoang ho sechaba.

Khaho ea tsela ena ea letšoana e kopanyang Alwyn's Kop le leliboho la Tele ke o mong oa merero e meholo eo 'Muso o ikelelitseng hore o e phethahatse kaha khaho ea tsela ena e akofisitse maeto a sechaba sa tikoloho ena ekasitana le sechaba sa Basotho ka kakaretso.

Litsela li na le tlatsetso e kholo nyollong ea moruo oa naha ea habo rona. Le lipaki tsa ka hore ka lebaka la sebopeho sa naha ea habo rona e lika-likelitsoeng ke naha ea Afrika Boroa, 'me ebile e le hole le maoatle, boholo ba maeto, ekaba a khoebo, a litšebeletso tsa bophelo, thuto, ekasitana le a mang a phethoa ka litsela. Ha litsela li le maemong a mabe, sena se ama litšebeletso tsohle tseo 'Muso o fanang ka tsona ho sechaba, 'me merero e metle ea ntlafatso ea sechaba e qetelle e sa fihle moo e hlokahalang teng.

Bo Ntate le Bo 'M'e,

Ka hona, sepheo sa 'Muso, ke ho ntlafatsa moruo oa Lesotho har'a tse ling ka ho aha litsela tse kholo tse kopanyang litereke, litoropo, ekasitana le maliboho. Kathoko ho morero ona oa tsela, 'Muso o ikemiselitse hore selemong sena sa lichelete o hahe litsela tsa letšoana tse eang malibohong a latelang e le ho ntlafatsa khokahanyo le Afrika-Boroa: tsela ea Marakabei ho ea Monontša, seterekeng sa Botha-Bothe le ea Ha Mpiti ho ea Sehlabathebe e feta le lelibohong la Ramatšelisō seterekeng sa Qacha's Nek. 'Muso o

boetse o na le moralo oa ho aha litsela tse latelang lilemong tse 'maloa tse tlang: tsela e kopanyang Ha Montšo le Sephapho's Gate, Mohale's Hoek, tsela e kopanyang Mphaki le Ongeluk's Nek, tsela e kopanyang Litšoeneng le Tšupane's Gate ekasitana le e kopanyang toropo ea Mohale's Hoek le Borokho ba Makhaleng.

Ho phetheloa ha khaho ea tsela ena e kopanyang Alwyn's Kop le leliboho la Tele e arabela ka kotloloho sepheo sena kaha har'a tse ling e tlo ntlafatsa khoebo le khoebisano lipakeng tsa naha ea Lesotho le Afrika-Boroa ekasitana le lefatše lohle kaha boholo ba thepa e tsoang linaheng tse ling tsa Afrika le mose ho maoatle e fihla ka likepe Natala le Kapa.

Khaho ea tsela ena e etsoa nakong eo 'Musu o emeng ka matla ho loantša litlolo tsa molao tse bonahalang li jele setsi kahare ho naha ena ea habo rona. Ka hoo, ho hlakile hore joale sepolesa se atleha ho fihla ka potlako moo litlolo tsa molao li etsahalang, le ho fihla ka nako ho pholosa maphelo pele a timela kapa le hona ho fihla ka nako pele litlolo tsa molao li etsahala.

Bo Ntate le Bo 'Mé,

Kathoko ho mona, sebaka sena ke sebaka se setle haholo, se nang le lithaba le lihloliloeng tse khahlang bahahlauli. Kahoo, khaho ea tsela ena e tlo ntla fatsa bohahlauli haholo sebakeng sena kaha ke lumela hore bahahlauli ba bangata ba tla e sebelisa ho tla hona mona Quthing, ho ea Qacha's Nek, Thaba-Tseka ekasitana le ho fihlela motse-moholo Maseru.

Kajeno, 'Muso o arabetse sello sa lona sa nako e telele, ka ho nolofatsa bophelo ba lona ba letsatsi le letsatsi. Bothata ba nako e telele ba bakhachane le bakuli ba neng ba tsamaea nako e telele tseleng e mpe ho ea sepetelele Mohale's Hoek kapa Quthing bo rarollehile. Kahoo ke ea le lebohela.

Moo tsela e leng teng lintlafatso lia eketseha, kaha joale tsela e ntle 'me tšenyeho ea makoloi e tla theoha le maeto a phethahale ka nako e khutšoanyane. Joalo ka ha ke boletse pejana, 'Muso o ikemiselitse ho loantša bofuma ka litsela tsohle. Kahoo, ke leano la 'Muso hore mererong e meholo joalo ka ona, sechaba sa moo

morero o leng teng se tšoarise matsoho mesebetsing e hlahisoang ke morero. Ke tlalehetsoe hore ke bonyane batho ba ka bang lekholo le leshome le metso e mehlano ba fumaneng mosebetsi morerong ona oa tsela, 'me sena ke lumela se entse phetoho ka malapeng a basebetsi bao.

Bo Ntate le Bo 'Mé,

'Muso o tšoenyehile haholo ke maemo a hlobaetsang a litsela naha kamoka. Sena ke tlalehetsoe hore se bakoa ke hore boholo ba litsela tsa rona tse kopanyang litereke le metse ea litoropo e se e le nako joale li ahiloe 'me li hloka ho ahoa bocha. Ke boetse ke tlalehetsoe hore boemo bona bo hlobaetsang ba litsela, bo mpefatsoa ke phetoho ea leholimo eo morao tjena e bakang lipula tse ngata tse nang ka tsela e sa tloaelehang ka nako e khutšoane hoo li imelang methamo ea metsi ea litsela. Ke rata hore ke nke monyetla ke sa le mona, hore ke re ho lona litsebi tsa litsela, kopanyang maboko ho tlisa tharollo holima khaho ea litsela tse tla arabela maemo ana a hlobaetsang a leholimo.

Sena kea lumela hore se tla qosa 'Muso chelete e ngata hobane libakeng tseo esale re tseba e le liqanthana ha lipula li na ka matla li fetoha linoka tse kholo 'me tseo ho hlakahalang hore li etsetsoe marokho a maholo e seng a manyane kapa likotopo feela.

Mosotho oa khale o ee a re: **“Likhomo ha li kae, batho re bangata”**. Tlhokahalo ea litsela ke qholotso e kholo e tjametseng 'Muso. Leha ho le joalo, lichelete tse teng ha li lekane hore 'Muso o phunye litsela ho latela tlhoko e kholo e teng naha ka bophara. E le ho arabela tlhoko ena 'Muso o tsoile letšolo ho kopa lichelete ho bafani hore litsela tse ncha li phunngoe ekasitana le hore tse teng li lokisoee.

Ke tlalehetsoe hore Lekala la Mesebetsi ea Sechaba le Lipalangoang le se le phethetse meralo ea khahobocha ea litsela tse 'maloa tse kholo le tse kopanyang litereke tse kang litsela tsa toropo ea Maseru, Mafeteng ho ea Mohale's Hoek le Quthing ho fihla Qhoali, Berea ho ea Leribe le Botha-Bothe (Oxbow). Ke utloa hore meralo eo e sitoa ho phethahatsoa ka lebaka la tlhokahalo ea lichelete.

Joalo kaha ke boletse pejana, 'Muso o se o qalile ho etsa maoala ohle ho fumanela litsela tsena chelete ea khaho-bocha. Ho bonahetse ka nako e telele mahlo a ile a sekamela ho phunya litsela tse ncha tseo kamorao ho moo li sa lokisoeng ka mokhoa o lokelang ka lebaka la tlhokahalo ea lichelete, hoo litsela tsena li qetellang li sa phele nako e telele kaha li senyeha kapele 'me li qose 'Muso ho li aha bocha ka lichelete tse ngata.

Bo Ntate le Bo 'Me,

Ntumelleng ke thethe puo ea ka ka ho lebohela sechaba sa Liphakoe ekasitana le Basotho bohle, le hore ke re tsela ena e kopanyang Alwyn's Kop le Tele e butsoe ka molao.

Molimo o boloke Lesotho le Basotho!

KHOTSO!

PULA!

NALA!